

Na osnovu člana 16. stav 1. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10) i člana 30. stav (3) Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 1/14), na prijedlog Ministarstva za boračka pitanja, Vlada Zeničko-dobojskog kantona, na 172. sjednici održanoj dana 10.07.2014. godine, d o n o s i

## **U R E D B U**

### **O SUFINANSIRANJU SPORTSKIH AKTIVNOSTI RATNIH VOJNIH INVALIDA**

#### **DIO PRVI - OPĆE ODREDBE**

##### **Član 1.**

##### **(Predmet Uredbe)**

Ovom Uredbom utvrđuju se uvjeti, način i postupak za ostvarivanje sredstava u svrhu participacije troškova sportskih manifestacija i invalidskog sporta branilaca - ratnih vojnih invalida, koji imaju prebivalište na području Zeničko-dobojskog kantona (u daljnjem tekstu: Kanton), kao i povratnika u Republiku Srpsku koji ostvaruju osnovna prava iz branilačko-invalidske zaštite u općinama Kantona i koji su na evidenciji nadležnog organa za vojne evidencije u općinama Kantona.

##### **Član 2.**

##### **(Korisnici prava)**

Korisnici sredstava po ovoj Uredbi mogu biti:

- a) ratni vojni invalidi – sportisti;
- b) invalidski sportski savezi i invalidski sportski klubovi, čiji sastav pretežno čine ratni vojni invalidi;
- c) kantonalna udruženja ratnih vojnih invalida za potrebe održavanja sportskih manifestacija.

##### **Član 3.**

##### **(Sportske aktivnosti)**

Sredstva po ovoj Uredbi mogu biti dodijeljena u svrhu sufinansiranja:

- a) učešća u sportskim takmičenjima i manifestacijama invalidskih sportskih klubova i pojedinaca u invalidskim sportovima;
- b) organizovanja sportsko-rekreacionih takmičenja i aktivnosti, te manifestacija u sportu i rekreaciji invalidnih lica;
- c) rada invalidskih sportskih saveza i asocijacija;
- d) rada sportskih organizacija koje okupljaju ratne vojne invalide.

##### **Član 4.**

##### **(Namjena sredstava)**

- (1) U skladu sa ovom Uredbom osigurat će se sredstva kantonalnim udruženjima ratnih vojnih invalida za održavanje sportskih manifestacija.

(2) Uredbom će se osigurati i sufinansiranje:

- a) takmičarskih aktivnosti invalidskih klubova u sjedećoj odbojci;
- b) Saveza za sport i rekreaciju ZDK, Saveza sjedeće odbojke ZDK i asocijacija košarke u kolicima i sjedeće odbojke FBiH, odnosno Bosne i Hercegovine;
- c) takmičarskih aktivnosti košarkaških invalidskih klubova i reprezentativnih selekcija prilikom učešća na pozivnim turnirima u inozemstvu;
- d) takmičarskih aktivnosti invalida - sportista na međunarodnim takmičenjima i takmičenja u pojedinačnim sportovima na državnom, Federalnom i Kantonalnom nivou;

#### Član 5.

##### **(Raspodjela sredstava)**

Raspodjela sredstava u skladu sa ovom Uredbom vrši se prema programu utroška budžetskih sredstava Ministarstva za boračka pitanja Kantona (u daljnjem tekstu: Ministarstvo), kojeg za svaku godinu donosi Vlada Kantona, a na osnovu dostavljenih zahtjeva korisnika i njihovih godišnjih kalendara takmičenja, finansijskih programa te konkretnih procjena u vezi:

- a) značaja sportske manifestacije;
- b) brojnosti članstva invalidskog kluba, saveza ili asocijacije;
- c) ranga takmičenja;
- d) ostvarenih sportskih rezultata reprezentativnih selekcija u invalidskim sportovima koje obuhvataju i članove iz Kantona, klubova i pojedinaca.

#### Član 6.

##### **(Korištenje pojma i dokazivanje statusa)**

- (1) Pojam iz ove Uredbe: ratni vojni invalid, upotrijebljen je u skladu sa odredbama Zakona o pravima branilaca i članova njihovih porodica ("Službene novine Federacije Bosne i Hercegovine" broj 33/04, 56/05, 70/07 i 9/10).
- (2) U postupku ostvarivanja prava po ovoj Uredbi, korisnici prava svoj status dokazuju rješenjem nadležnog organa o priznavanju prava na ličnu invalidninu za ratnog vojnog invalida, odnosno izvršenoj registraciji udruženja, izdatim u skladu sa važećim federalnim propisima iz istih oblasti.

## DIO DRUGI - POSTUPAK DODJELE NOVČANIH SREDSTAVA

#### Član 7.

##### **(Podnošenje zahtjeva)**

- (1) Zahtjevi općinskih sportskih klubova i sportista pojedinaca za odobravanje sredstava, podnose se općinskoj službi nadležnoj za poslove branilačko-invalidske zaštite u općini u kojoj podnosilac zahtjeva ima sjedište/prebivalište odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: općinska služba), koja je obavezna zahtjev obraditi i utvrditi prijedlog visine finansijske pomoći.
- (2) Zahtjevi sportskih saveza i asocijacija invalidskog sporta organizovanih na Kantonalnom i višem nivou, izravno se dostavljaju Ministarstvu.

#### Član 8.

##### **(Sadržaj zahtjeva)**

Zahtjev za finansijsku pomoć obavezno sadrži:

- a) naznaku grane sporta i ranga manifestacije odnosno takmičenja, sa vremenom i mjestom održavanja;
- b) poziv organizatora takmičenja (za takmičenja u inozemstvu);
- c) finansijski plan – troškovnik održavanja manifestacije odnosno takmičenja i visinu potrebnih sredstava pomoći;
- d) podatke o učesnicima odnosno takmičarima i pripadnosti kategoriji ratnih vojnih invalida, kao i stepen invalidnosti, ukoliko se radi o pojedinačnim - individualnim sportskim takmičenjima;
- e) odluku odgovarajućeg organa o organizovanju manifestacije odnosno učešću na takmičenju.

#### Član 9.

##### **(Postupak po zahtjevu)**

- (1) Odluku o dodjeli sredstava utvrđenih Programom utroška sredstava, donosi ministar Ministarstva.
- (2) Na obrazloženi prijedlog ministra Ministarstva, zaključak o dodjeli sredstava za finansijsku pomoć u ostalim sportskim aktivnostima, donosi Vlada Kantona.
- (3) Isplata sredstava se vrši putem žiro računa udruženja, sportske organizacije ili pojedinca, kojima su sredstva odobrena.

#### Član 10.

##### **(Dostava i pravdanje sredstava)**

- (1) O doznačenim sredstvima za isplatu sredstava po ovoj Uredbi, općinska služba obavještava korisnike i istim vrši isplatu putem tekućih računa.
- (2) Općinska služba je dužna Ministarstvu dostaviti pravdanje utrošenih sredstava u roku od 15 dana po izvršenoj isplati.
- (3) Korisnik sredstava (savez, klub, pojedinac) je dužan u roku od 15 dana od dana održavanja takmičenja dostaviti Ministarstvu pravdanje utroška odobrenih sredstava.

### DIO TREĆI - ZAVRŠNE ODREDBE

#### Član 11.

##### **(Sredstva za ostvarivanje prava)**

Sredstva za realizaciju prava branilaca i članova njihovih porodica po ovoj Uredbi osiguravaju se u Budžetu Kantona u skladu sa prilivima sredstava.

#### Član 12.

##### **(Evidencija)**

Elektronsku evidenciju o podnesenim zahtjevima i korisnicima prava po ovoj Uredbi vode općinske službe i Ministarstvo, po obrascima koje propisuje ministar Ministarstva, u roku od osam dana od dana stupanja na snagu ove Uredbe.

#### Član 13.

##### **(Ravnopravnost spolova)**

Sve imenice koje se odnose na branioce i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 14.

**(Stavljanje Uredbe van snage)**

Danom stupanja na snagu ove Uredbe prestaje važiti Uredba o participaciji troškova sportskih manifestacija i invalidskog sporta branilaca i članova njihovih porodica ("Službene novine Zeničko-dobojskog kantona" broj 20/07 i 5/13).

Član 15.

**(Stupanje na snagu i objavljivanje Uredbe)**

Uredba stupa na snagu danom donošenja, a ista će biti objavljena u "Službenim novinama Zeničko-dobojskog kantona".

Broj: 02-\_\_\_\_\_/14.

Datum, 10.07.2014. godine

Zenica

**PREMIJER**

***Munib Husejnagić, dipl.ing.maš.***

DOSTAVLJENO:

1x Ministarstvo za boračka pitanja,

1x Ministarstvo finansija,

1x Službene novine Zeničko-dobojskog kantona,

1x a/a.